

आकाशवाणी रायपुर (छत्तीसगढ़)  
प्रादेशिक समाचार (छत्तीसगढ़ी)

1810 बुधवार

25.09.2024

प्रमुख समाचार –

- 1- पीएमश्री योजना के तहत प्रदेश के अठहत्तर स्कूल ल मिलीस स्वीकृति – मुख्यमंत्री ह प्रधानमंत्री के जतइन आभार।
- 2- प्रधानमंत्री जनजातीय उन्नत ग्राम अभियान जल्दीच होही सुरु – केंद्रीय जनजातीय कार्य मंत्रालय के अतिरिक्त सचिव करीन कलेक्टर मनले चर्चा।
- 3- राज्य शासन ह अवइया शारदीय नवरात्र म प्रदेश के आने-आने सक्तिपीठ मन म ज्योति कलश प्रज्वलित करय अउ प्रसाद निर्माण बर देवभोग घी के उपयोग करे के जारी करीन निरदेस।

पीएमश्री योजना

छत्तीसगढ़ के अठहत्तर स्कूल ल पीएमश्री योजना के स्वीकृति मिले हे। प्रदेश म अइसे स्कूल के संख्या अब तीन सौ इकतालीस हो गेहे, जेला पीएमश्री योजना के तहत उन्नयन करे जाही। मुख्यमंत्री विष्णुदेव साय ह एखर बर प्रधानमंत्री नरेंद्र मोदी के आभार जताय हे। ओमन किहीन कि पीएमश्री योजना के माध्यम ले सैक्षणिक अधोसंरचना अउ शिक्षा के स्तर ल अच्छा बनाय के परयास निश्चित रूप ले विकसित भारत के निर्माण म अहम भूमिका निभाही। मुख्यमंत्री ह किहीन कि पीएमश्री योजना म सामिल ए स्कूल मन म राष्ट्रीय शिक्षानीति के अंतर्गत उत्कृष्ट विज्ञान प्रयोगशाला, पुस्तकालय अउ व्यवसायिक लैब के व्यवस्था होही, जउन छत्तीसगढ़ ल शिक्षा क्षेत्र म नवा ऊंचाई म ले जाही।

पीएम जनजातीय उन्नत ग्राम अभियान

देसभर म तुरते ही प्रधानमंत्री जनजातीय उन्नत ग्राम अभियान सुरु होही। अभियान के क्रियान्वयन के संबंध म केंद्रीय जनजातीय कार्य मंत्रालय के अतिरिक्त सचिव आर.जया ह वीडियो कॉन्फ्रेंसिंग के माध्यम ले आज देसभर के जिला कलेक्टर ले चर्चा करीन। ए दौरान ओमन ह कलेक्टर मन ल जरूरी दिसा निरदेस दीन। बलौदाबाजार कलेक्टर दीपक सोनी ह बतइन कि प्रधानमंत्री जनजातीय उन्नत ग्राम अभियान के तहत जिला के जनजातीय बहुल छियालिस गांव के चयन करे गेहे। ओमन ह बतइन कि अभियान के तहत चयनित गांव म विभागीय योजना के सत-प्रतिसत क्रियान्वयन सुनिश्चित करे जाना हे। ए अभियान म अधोसंरचना विकास संग अच्छा स्वास्थ्य अउ गुणवत्तापूर्ण शिक्षा के पहुंच म जोर दे जाही।

जेपी नड्डा-रायपुर

भारतीय जनता पार्टी के राष्ट्रीय अध्यक्ष जे.पी.नड्डा ह काली छब्बीस सितंबर के छत्तीसगढ़ के एक दिवसीय प्रवास म रईपुर आही। ए दौरान श्री नड्डा कुशाभारु ठाकरे परिसर म पार्टी के सदस्यता अभियान के प्रगति के समीक्षा घलो करही। एखर बाद ओमन ह पार्टी के आने-आने कारीकरम म सामिल होही। बड़ठका म मुख्यमंत्री विष्णुदेव साय, प्रदेश अध्यक्ष किरण देव समेत पार्टी के प्रमुख पदाधिकारी सामिल होही। एखर बाद राष्ट्रीय अध्यक्ष श्री नड्डा देर रतिहा दिल्ली बर रवाना होही।

### भाजपा सदस्यता-अभियान

मुख्यमंत्री विष्णुदेव साय ह आज जशपुर जिला के बगिया म पंडित दीनदयाल उपाध्याय के जयंती के मउका म भाजपा सदस्यता अभियान के उद्घाटन करीन। ए कारीकरम म मुख्यमंत्री ह सौ नवा सदस्य ल भाजपा के ऑनलाइन सदस्यता दिलाइन। ए दौरान भाजपा कार्यकर्ता मन ल संबोधित करत मुख्यमंत्री ह किहीन कि पार्टी के लक्ष्य ए बखत पचास लाख नवा सदस्य ल जोड़े के हे। ओमन ह हर कार्यकर्ता ल सौ नवा लोगन ल भाजपा के सदस्यता दिलाय के निरदेस दीन।

### कलेक्टर-निर्देश

राज्य शासन ह सबो कलेक्टर मन ल दिसा-निरदेस देहे कि अवइया शारदीय नवरात्र म प्रदेस के आने-आने सक्तिपीठ मन म ज्योति कलश प्रज्वलित करय अउ प्रसाद निर्माण बर देवभोग घी के उपयोग करे जाय। राज्य के कृषि उत्पादन आयुक्त ह सबो कलेक्टर मन ल भेजे गे पाती म किहीन कि छत्तीसगढ़ राज्य सहकारी दुग्ध महासंघ राज्य म दुग्ध व्यवसाय के शीर्ष स्थान हे। एखर द्वारा प्रदेस म लगभग सात सौ दुग्ध सहकारी समिति मनले संबध तीस हजार ले जादा पसुपालक परिवार मन ले दूध के संकलन करे जात हे। एखर डहार ले मानक के अनुरूप दूध अउ दूध ले बने आने उत्पाद उपलब्ध कराय जाय।

कलेक्टर मन ल भेजे गे पाती म कृषि उत्पादक आयुक्त ह किहीन कि सक्तिपीठ मन म देवभोग घी के उपयोग ले राज्य के पसुपालक मनके हित होही।

### राजस्व मंत्री-फसल सर्वे

राजस्व मंत्री टंकराम वर्मा ह आज बलौदाबाजार -भाटापार जिला के सकरी गांव म डिजीटल क्रॉप सर्वे के अवलोकन करीन। ओमन ह एक झिन किसान के खेत म पहुंच के जियो-रिफ्रेंसिंग के माध्यम ले मोबाइल ले एंट्री करके उंखर खसरा नंबर के सत्यापन करीन। ए दौरान ओमन किहीन कि बछर दू हजार सैंतालीस तक भारत ल विकसित राष्ट्र बनाय बर सरकारी काम काज म डिजीटल टेक्नालॉजी के उपयोग करे जात हे। डिजीटल क्रॉप सर्वे घलो उंखर एक उदाहरण हरय। एखर ले फसल के सही जानकारी मिलही।

### आयुष्मान पखवाड़ा

आयुष्मान भारत प्रधानमंत्री जन आरोग्य योजना के तहत प्रदेस म तीस सितंबर तक आयुष्मान पखवाड़ा मनया जात हे। एखर तहत मुंगेली जिला के लछनपुर गांव म "घर घर आयुष्मान-हर घर आयुष्मान" नारा के संग स्कूली लइका मन ह रैली निकालिन। रैली के माध्यम ले लोगन ल आयुष्मान के लाभ अउ आयुष्मान कार्ड पंजीयन कराय बर जागरूक करे गीस। उहें, बलरामपुर म आयुष्मान पखवाड़ा के तहत हाई स्कूल मैदान ले जागरूकता साइकिल रैली निकाले गीस। ए रैली हाई स्कूल ग्राउंड ले सुरु होके पुराना बस स्टैण्ड म समाप्त होइस। रैली ल मुख्य चिकित्सा अधिकारी डॉक्टर बसंत सिंह ह हरा झंडी दिखाके रवाना करीन। ए रैली म बड़का संख्या म स्कूली छात्र-छात्रा ह भाग लीन अउ लोगन ल आयुष्मान योजना के प्रति जागरूक करीन।

ओति, कोंडागांव जिला म आयुष्मान पखवाड़ा के तहत बीस ले तीस सितंबर तक हितग्राही मनके आयुष्मान कार्ड बनाय जात हे। अइसे हितग्राही जेखर आयुष्मान कार्ड अभी तक नइ बन पाय हे। स्वास्थ्य कार्यकर्ता उंखर घर जाके अउ गांव म सिविर लगाके आयुष्मान कार्ड

बनावत हे। संगेसंग लोगन ल जागरूक करे बर विकासखंड स्तर म स्वास्थ्य सिविर, आयुष्मान सभा अउ जागरूकता रैली के आयोजन करे जात हे।

### दीनदयाल उपाध्याय-जयंती

पंडित दीनदयाल उपाध्याय के जयंती म आज मुख्यमंत्री विष्णुदेव साय ह जशपुर जिला के बगिया म आयोजित कारीकरम म ओमन ल श्रद्धांजलि दीन। ए दौरान ओमन किहीन कि पंडित दीनदयाल उपाध्याय एक झिन अइसे युगदृष्टा रिहीन, जेखर विचार अउ सिध्दांत ह देस ल प्रगतिसील विचारधारा दीन। मुख्यमंत्री ह किहीन कि उंखर अंत्योदय सिध्दांत म चलके हम सब आम लोगन के जीवन स्तर ल अच्छा बनाय बर प्रतिबद्ध हन। उहें, उपमुख्यमंत्री अरुण साव ह बिलासपुर के पंडित दीनदयाल उपाध्याय उद्यान म उंखर प्रतिमा उपर फूलमाला चढ़ाके के श्रद्धांजलि दीन। ए दौरान श्री साव ह बिलासपुर नगर-निगम डहार ले आयोजित स्वच्छता ही सेवा पखवाड़ा म सामिल होइन। ओमन ह विधायक अउ आने प्रतिनिधि के संग झाड़ू लगाके उद्यान के सफई करीन। एखर संगेसंग ओमन ह स्वच्छता मैराथन ल हरा झंडा दिखाके रवाना करीन अउ स्वच्छता दीदी मन ल साड़ी अउ कीट घलो बांटिन।

### मौसम

मौसम विभाग के अनुसार एक उपरी हवा के चक्रीय-चक्रवाती घेरा दक्षिण छत्तीसगढ़ अउ उंखर तीर-तखार म हवय। उहें, एक द्रोणिका उत्तर कोकण ले छत्तीसगढ़ तक बने हुए हे। एखर असर ले आज राजधानी रईपुर संग कुछेक जिला म हल्का बरसा दर्ज करे गीस। उहें, काली प्रदेश म कुछेक जघा मन म हल्का ले मध्यम बरसा होय अउ गरज-चमक के संग छींटा पड़े के संभावना हे। एखर संगेसंग एक-दू जघा मन म आकाशीय बिजली गिरे के घलो आसार हे।

### संक्षिप्त समाचार

- राज्य शासन ह विश्व विजय सिंह तोमर ल छत्तीसगढ़ राज्य युवा आयोग के अध्यक्ष नियुक्त करे हे। ए संबंध म खेल अउ युवा कल्याण विभाग ह आदेस जारी कर देहे।
- लोक निर्माण विभाग ह बत्तीस अभियंता के नवा पदस्थापना बर आदेस जारी करे हे। एमा कार्यपालन अभियंता ले लेके सहायक अउ उप अभियंता सामिल हे।
- लोक निर्माण विभाग ह राजनांदगांव के कार्यपालन अभियंता ए.के.चौहान ल बीते दू सितंबर के आयोजित विभागीय मंत्री विजय शर्मा के समीक्षा बइठका म नइ पहुंचे म निलंबित कर देहे।
- रईपुर रेल मंडल के अंतर्गत सिध्दबाबा समपार फाटक मरम्मत काम बर चलत अट्ठाइस सितंबर के बिहनिया आठ बजे ले उनतीस सितंबर के बिहनिया नौ बजे तक बंद रइही।
- रईपुर के शासकीय आयुर्वेद महाविद्यालय चिकित्सालय म काली छब्बीस सितंबर के सून्य ले सोलह बछर तक के लइका मन ल स्वर्णप्राशन कराय जाही।

\*\*\*\*\*  
\*\*\*\*\*